

Uunga siunnersuut: Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaata allanngortinneqarnissaa pillugu Inatsisartut inatsisaat (Aningaasaqarnermut Nunamullu Namminermut Naalakkersuisoq)

Saqqummiussissut

(Aningaasaqarnermut Nunamullu Namminermut Naalakkersuisoq)

Siullermeerneqarnera

Naalakkersuisut sinnerlugit matumuuna Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaata allanngortinneqarnissaa pillugu Inatsisartut inatsisaattut siunnersuut saqqummiunneqassaaq.

Siunnersuut assigiinngitsunik arlalinnik allannguutitaqarpoq. Tulliuttuni pingaernerit eqqartorniarpakka.

2018-imi ukiakkut ataatsimiinnermi Inatsisartut Inatsisartut inatsisaanni §§ 2-5-imi aalajangersakkat 31. decembari 2021-p tungaanut atorunnaarsinneqassasut akuersissutigaat. §§ 2-5 kommunini Namminersorlutillu Oqartussani missingersuutit naatsorsuisarnermut tunngapput. Taakku ajoraluartumik periaatsitigut naapertuutinngitsunik imaqarnerat atorunnaarsitsigallarnermut pissutaavoq.

Allannguutitut siunnersuut aalajangersakkat atorunnaarsinneqarallartut assinganik tunngaveqarpoq. Taamaattoq naapertuutinngitsunik arlalinnik naleqqussaasoqarsimavoq. Siullertut taamaallaat kommunit ukiumoortumik missingersuutaat aamma Namminersorlutik Oqartussat aningaasaqarnermut inatsisaat najoqqutarineqarput. Siunissami kommunit aamma Namminersorlutik Oqartussat naatsorsuutaat ilanngunneqassanngillat. Saniatigut aamma naleqqusnaanernik inuit amerlassusiisa ineriartornerik, aningaasaliinerit annernut katersinernik aamma kommunit Namminersorlutillu Oqartussat akornanni suliaannik nuussineranut ilanngussisunik innimittarnissamut periarfissiisunik ilanngussisoqarpoq.

Naalakkersuisooqatigiinnissamik isumaqatigiissut tunngavigalugu aamma, Namminersorlutik Oqartussat missingersuutitigut inissisimanerata naatsorsorneqarnerani aamma Inatsisartuni akuerineqarnerata kingorna, naatsorsuinnermi aningaasartuutit ineqarnermi, inuussutissarsiornermi imaluunniit ataqatigiittumik aaqqissuussinnermi suliniutit aningaasaliinernut atatinneqarsinnaasut, ataatsimut isigalugu inuiaqatigiit aningaasaqarneranut iluanaarutaasutut nalilerneqarpata ilanngunneqartariaqanngitsut siunnersuutigineqarpoq. Piumasaqaatit naammassineqarsimappata taava ineqarnermi, inuussutissarsiornermi imaluunniit ataqatigiittumik aaqqissuussinnermi suliniutinut aningaasartuutit akilerneqarsinnaaneritut periarfissiivoq, massa aningaasartuutit aningaasanut inatsimmi amigartoornermik aningaasarsiornikkullu siuariartornermik kinguneqaraluartut.

Namminersorlutik Oqartussani pitsaanagerusumik missingersuutunik suliaqarneq anguniarlugu Namminersorlutik Oqartussat illuutaanik aalaakkaasunik, sanaartugaataanik pigisaanillu nalilinnik allanik ingerlaavartumik aserfallatsaaliuinnermut iluarsaassinernullu aningaasanut inatsimmi immikkoortitsisoqarnissaa pillugu malittarisassanik aalajangiinissamut Naalakkersuisut piginnaatinneqassasut siunnersuutigineqarpoq. Oqaluttuarisaanermi Namminersorlutik Oqartussanut nammineq pigisat nalilinnik aserfallatsaaliornissaq ilungersunartuusimavoq. Assersuutigalugu ineqarnermik suliaasaqarfik annertuumik aserfallatsaaliuinnermi kinguaattoorfiuvoq. Namminersorlutik Oqartussat sanaartukkanik pigisaannik ingerlaavartumik aserfallatsaaliuinissamut naammattumik aningaasaliisoqarnissaa anguniarneqarpoq.

Kommunalbestyrelsit Sanaartugassanut Iluarsagassanullu Aningaasaateqarfinnik pilersitsinissamut periarfissinneqassasut siunnersuutigineqarpoq. Taanna naatsorsuutitut teknikikkut iluaqutunik Namminersorlutik Oqartussat aaqqissuussineq iluaqutigalugu pigisaasa assinganik kommuninut tunisissaaq.

Kommunit innuttaasunit suliffeqarfinnillu pissarsiassaasa nalunaarsorneqarsimasut ilaat qaquguluunniit akilerneqarnissaat ilimanangilaq. Kommunit eqqornerusunik naatsorsuuteqalernissaat anguniarlugu, kommunit kingusinnerpaamik ukioq naatsorsuiffik 2023-mit atuutilertumik, ukiut marlunnik imaluunniit pisoqaanagerusunik nammineq aningaasaatiminnik nalikilliliinissamut ataasiarluni akuersissummik pissarsisinnaassasut siunnersuutigineqarpoq. Erseqqissarneqassaaq, innuttaasut suliffeqarfiillu suli kommuninut akiligassaminnik kinguaattoornikunik akiliisussaammata, massa kommunini naatsorsuutitigut nalikilliliisoqaraluartoq.

Inaarutaasumik siunnersuut aamma teknikkuunerusoq allanguutunik arlalinnik imaqarpoq. Tassunga atatillugu siunnersuummut tassungalu oqaaseqaatinut innersuusserusuppunga.

Taamatut oqaaseqarlunga siunnersuut Inatsisartunut suliaassanngortippara.